

Beibel Tin Eror?

Tin hopi opinion ku nos por tende ekspresá ku nos no ta di akuerdo ku ne, pero tòg nos ta laga pasa sin reakshoná. Pero ora ta trata di e fundeshi di nos fe, Beibel, nos no por keda ketu. Ultimo dlanan, tantu na radio komo den korant, e opinion a wordu ekspresa ku den Beibel tin eror.

Den nos mundu awendia kos ta kambia di un dia pa otro. Un filosofia ku hende ta konfia awe, ta laga nan na kaya mañan. Pero Beibel no ta asina. Pa siglonan kaba, hende por konfia Beibel su siñansa; i den tur e siglonan nunca Beibel a laga nan na kaya. Miles di hende asta a preferá muri ku bandoná nan konfiansa den Beibel. Beibel su siñansa ta mésun relevante awe ku e tabata siglonan pasá. Ta mes piká awendia pa mata, hòrta, of kometé aktonan inmoral ku tabata tempu Dios a duna e Dies Mandamentunan. Ma ata, awor, diripiente, nos ta wòrdu informá ku e Buki Dibino ku miles di hende a konfia i muri pe ta kiboká.

E kerensia aki, ku Beibel tin eror, no ta solamente robes ma tambe arogante i sumamente peligroso! Dikon?

1. Ora un hende bisa ku ún parti di Beibel tin eror, e ta pretendé di ta un eksperto di alta kalidat ku te ainda mundu no a yega di mira, riba nivel di Dios mes! Pa siglonan kaba hende ku ta biba conforme instrukshon di Beibel, ta gosa di Dios Su bendishon. Ma awor nos ta haña nos ku un sorpresa grandi! Hende, esun ku a wòrdu kreá, a bin haña sa ku e Kreador a kiboká ora El a skirbi Su manual kon Su kreashon mester biba!

Pa bisa ku Beibel tin eror, bo mester por proba esei; bo mester tin evidencia i faktonan; bo mester a hasi un inestigashon sumamente profundo. En bèrdad, bo mester tin mes sabiduria ku Dios mes! Pasobra te ainda, den historia di mundu, ora un persona a kontradisí sierto parti di Santu Skritura, a wòrdu probá despues ku ta e persona a kiboka, no Beibel! Si bo no por proba ku Beibel ta kiboka, mihó no riska kontradisi e Buki ku a wordu probá bes tras bes di ta e Bèrdad!

2. Si tin asta ún eror den Beibel, no por konfia ningun otro parti di Beibel. Esun ku por haña e erornan den Beibel mester ta un hende sumamente sabí. Kon e por sa ku ta nèt e parti ei di Beibel (ku pa kolmo hopi biaha ta presisamente e siñansa ku e mes no ta gusta) ku tin eror, i un otro parti no? Kon e por sigurámi ku e parti aki di Beibel tin eror, Anto bisami ku e mésun siguransa ku e parti aya si ta sin eror? Kisas mañan e lo haña un otro "iluminashon" i bin deskubri ku tin eror den e Dies Mandamentu—ku “afterall” no ta piká mas pa hòrta òf mata òf hasi aktonan inmoral. Si un parti di Beibel tin eror, kon e por sigui kere otro siñansa di Beibel, manera e doktrina ku Maria tabata un birgen, ku Jesus a muri riba krus, ku shelu ta eksisti? En bèrdad, si tin asta ún eror den Beibel, nos no por konfia ningun parti di Beibel.

Den otro palabra, tin un di dos opshon. 1. Bo por aseptá ku Beibel, siendo inspirá pa Dios, TA SIN EROR, Anto biba conforme su instrukshon. 2. Of bo por kere ku Beibel tin eror. Ma si bo kere ku tin asta un eror den Beibel, mihó bo hiba bo Beibel landfill, pasobra kisas tin hopi mas eror den Beibel, i un Beibel asina ningun hende por konfia!